

南潯志卷四十五

里人周慶雲纂

大事記四

粵匪

鎗匪附

温鼎庚申粵匪據潯紀略咸豐三年春金陵為粵匪陷踞蘇常

一帶遷避紛紛潯之東西柵客舟絡繹而過人心惶惶謠言四

起湖郡趙君竹生設團防局南潯鋪戶按戶支更夜間十家懸

一燈鳴鑼巡警不數月安靜如常

南潯究非要道粵匪消息民間無由知之

蓋金陵

城外恃向軍門大營捍蔽遏賊東擾故此五六年中蘇杭得暫

安枕迨庚申二月初三賊由寧國陷廣德州初八陷安吉湖州

戒嚴初十一一兩日郡中挈眷遷避者日夜不絕潯地人心擾

亂鎗船諸匪盤踞南北設乘機蠢動肘腋堪虞十三日知長興

南潯志

卷四十五

大事記四

一

亦陷李定泰一軍敗於梅溪退至湖城十五日賊攻湖城警信

日至乃編十家牌輪流督更徹夜誼沸士民將家眷遷避於鄉

或至上海數日間遷去十之六七會雙林徐公有王任蘇撫調

總兵曾秉忠以長龍砲艇六十艘至湖軍容始壯擊賊走之郡

城固而南潯亦定賊退後竟從山徑陷武康十九黎明遂至杭

省武林門倉卒拒守廿七卯刻知杭省陷而嘉湖亦岌岌可危

南潯豈可無備由是温君金叔首倡團練設立保安局於西柵

祇園寺權僱鎗船首領沈榮吳長林集船百餘號給與保安旗

幟號掛火藥油燭五日一發口糧并勸各業及殷戶資助經費

部署稍定亦祇羈縻鎗匪俾無為賊非能使之禦寇也先是杭

城陷巡撫羅公遵殿死之旋聞張玉樑大軍由金陵來克復杭

城王公有齡繼爲巡撫四月間金陵大營潰蘇常繼陷湖屬團防更爲嚴密巡撫王公將令箭至湖一與趙一與溫爲城鎮團防領袖於是保安局由西柵移設東柵極樂庵中是時文報不通訛言四至幸潰兵均由嘉興塘而去吾潯尙無擾而平望亦無兵駐守惟四月中有軍自湖城來主兵者係江軍門長貴駐南潯一宿卽東至平望後不知所終迨二十六日知嘉興城陷在通津橋上望之黑煙一縷迤邐而南知賊焚掠沿塘村莊也居民又紛紛遷避至鄉蓋三月間光復杭省後郡城解嚴吾潯之避地者悉還故土至是平望已被賊踞距南潯祇四十餘里東則震澤僅有團局烽煙逼近與二月間迥殊各家僱船預爲避賊計惟店鋪開設如常五月二十日趙君自郡率水陸兵勇

南潯志

卷四十五

大事記四

二

由南潯東勦平望踞賊保安局鎗船隨往攻克之賊退至吳江時泗安告警趙君慮郡城有失遂還而平望仍爲賊踞是時如張玉樑一軍急攻嘉興另有客軍一支扼守平望各鄉團助之必可力拒蘇屬援賊克復嘉興乃張軍不至失此機會賊於六月十一日竄至震澤焚掠而南潯鋪戶居民奔避鄉間保安局鎗船各戀家口散去大半留局者僅恃其偵探賊信以便居民逃生幸是日賊不西竄吾潯夜間紛擾東望火光灼天至十二日黎明賊由震澤水陸撲南潯東柵遂放火殺人煙燄蔽天人聲哭聲如沸蓋留守家室監守店鋪人尙不少間有覓舟不得婦女彳亍難行逢賊被擄投河者約百人而被殺者尙少蓋賊恐郡城密邇未知官軍虛實四柵房屋均被燬鎮上住宅大半

無恙緣賊晨來過午卽去也而鎗船見賊已退卽打進典鋪搶掠並入富家擇物攜取十三日鄉人始敢出來由是土匪並鄉民見鋪戶典當人尙未歸將貨物掠取一空是夜火勢尙熾因無人撲救六典之阨均是土匪焚燬至十五日火始熄男人均歸河中死屍悉行認殮東柵自大街以西店鋪門面盡焚無遺南北柵店面焚去其半此六月十二賊匪初次擾潯遭劫情形也嗣震澤之賊退歸平望至八月間賊始踞震澤築堅壘設鄉官南潯賊退後店戶於東北兩柵支棚爲市絲行擇市稍易走之地置櫃收絲裝貨舟中權宜貿易衙署均被賊燬地方官無容身之地局紳溫君遇賊受傷極樂庵局所被焚溫君旋繳還令箭告退接辦者爲邱君笠亭仍用沈吳鎗船設局馬家港東

藏寺郡中派委員赴局地方土棍詐擾由局懲辦每日派鎗船赴震澤探賊動靜藉通消息潯民之避於鄉者患病不慣久住遷回不少乃八月十六日平望之賊向南潯沿塘西掠午刻至潯居人奔避倉皇河岸路塞賊四面兜焚搜擄次日擾及四鄉焚掠五六里之遠鄉間居民亦相率逃避十七日晚賊全行退去留僞官踞守震澤由是南潯離賊巢僅十二里被擄及傷斃者較多於初次南北柵店面又焚燒其半並及住宅房屋東藏寺局所亦付一炬邱君移局於豐年橋本宅斯時局中鎗船僅探震澤消息保衛絲商出境之用他處若馬要若七里西則驥村晟舍北則陸家灣太湖塘亦設團防局僅能防禦土匪未能隨軍打仗此外雙林有官軍駐守烏鎮先被賊踞蓋是年七月

張玉樑軍潰於嘉興城外奔往省中石門桐鄉平湖相繼失守南潯爲湖州東蔽賊往來孔道被擾安得不甚然商賈糾集殘貨支棚設攤又復成市何則店少價貴日用所需缺一不可頗獲倍利十二月中旬賊又擾潯四出焚掠中市無店無屋無人可居僅存者亦不敢居南北市面居家者離柵口不遠一有賊警脫走亦易故此大惟焚燒棚屋擄殺尙少與初二次情形不同惟沿鄉一帶禾穀登場被掠不少幸不佔據兩日間仍向震澤退去此庚申粵匪擾潯被災已三次十一年辛酉三月賊又西掠南潯四鄉六七里之地均被焚擄各鄉團伺賊尾聯舟而出襲擊一二藉以弋利未聞有遏其鋒者賊恨甚呼之曰鎗拐子旋復退去計擾兩日店棚房屋又復焚燬時浙東各郡縣失

陷愈多省中軍情日亟湖郡趙君時出援杭並剿城西竄擾之賊不暇東顧至是年八月廿五蘇城之賊大舉西擾並糾合烏鎮之賊同時並出廿五至潯潯人走避一空肆行焚掠每日天明向鄉間放火打先鋒西至晟舍東南至雙林及七里馬要各鄉北至各漣港煙焰日夜不絕避難之舟被賊包在中間幾不能出幸港汊紛歧或逃泊郡西或反避嚴墓踞賊安民之地轉可無虞餘則遇賊人財並失路上奔避之人望煙焰不起之處攜婦孺狂奔或前遇賊哭喊聲震天或潛匿田禾中日夜凍餒擄去及倒斃者被殺者頗多自庚申賊擾以來惟此次遭劫最慘至九月中旬趙君自湖郡率兵擊賊賊甫退杭省又被賊圍困守糧絕十一月廿八遂失守湖郡益孤賊由西南兩面先將

村鎮佔踞漸漸包圍並不力攻適十二月中旬大雪盈丈河道凍結賊乃由太湖突至大錢口將防守砲艇悉行掠去南潯於十二月下旬被賊踞守並不焚掠僞主將爲詹天燕於馬家港民居打館出示安民 咸豐十一年十二月賊始踞守南潯以長圍困湖城同治元年賊招本地人爲鄉官設軍帥師帥旅帥伯長等名目爲僞官惟軍帥最尊諸官皆屬焉令鄉民按戶出門牌由伯長而上收納軍帥局並設卡抽釐撥砲船駐柵口查緝各店鋪每日認定捐數書於簿賊日至店中收取若馬要七里村亦設卡收店捐置鄉官以納門牌米賊初踞潯時僞官詹天燕在馬家港朱少師第並李宅温宅打館鄉官局設於北小兜俞宅正二月間由鄉官局拘泥木匠將東弔橋以東沿河後

面包洗粉兜築土城至東總管堂開壕土築城垣將東柵上下岸所遺房屋拆取甄料修蓋東柵土城中之屋二月中遂移居士城內而馬家港遺存房屋亦拆取無遺城隍廟嘉應廟報國寺火神殿賢聖殿亦於元年二月被蘇城來賊拆取木料裝至蘇州名曰打柴火此寺宇被賊焚而復拆毀者也湖城被圍三月內已乏糧外無援兵雖時出擊賊圍終不解南潯自東柵土城以西大街上下岸直至營前一片焦土蓋賊由東往西爲水陸孔道居民無敢行走惟北柵之市在柵樁橋以北南柵之市在興福橋以南百間樓及藕河頭存屋無幾亦無人居住惟貧苦之家尚有棲止破屋中者斯時石米貴至十二千以外客米絕迹農民上年糧租均免尙不困乏惟經紀小民避居鄉間者

最苦幸絲商至滬歸則販米至潯藉以接濟較之郡城中民食草根樹皮以餓死者尙屬天淵故居鄉之家日限兩餐或一粥一飯以度日迨五月初三日湖城以糧盡失守浙西三郡及縣邑均被賊踞時軍帥局設在南柵受僞職者爲羅姓東遷鄉人尙樸愿無倚賊殃民事此外又設均安局受僞職者係潯人張姓絲船往滬用鎗船護送至盛澤外過一賊卡而回每包捐若干繳賊若干充局費固善於漁利者當時業絲之家藉得晏然出境尙屬兩得是年蠶禾兩收尙稔而米至冬六七千文各處踞賊坐收轄境之利並不出掠據賊云惟有野長毛過境防其打先鋒尙非大隊本地守境之賊亦可彈壓免其擾累元年二年幸未逢此雖與賊處尙能旦夕苟安二年左公宗棠軍由衢

州收復金嚴而台處兩郡已由民團克復秋冬間左公軍由富陽攻剿餘杭並從紹興渡江圍困省城是年十二月海寧賊首蔡元隆投誠海寧遂復而蘇撫李公鴻章已於二年秋克復蘇城遂移軍克吳江平望而平湖海鹽乍浦均於是冬克復蘇軍遂進攻嘉興府城是時南潯踞賊各相耳語知官軍勢盛於馬家港及藕河天帶橋北各築一土壘恐江南軍由東北襲攻也賊無守志羣思逃遁賊首踞守湖城均無出路同治三年賊首黃老虎因江南軍攻嘉興急左軍圍偪杭州賊勢日蹙乃於正月十六日大舉向菱湖雙林南潯各鄉鎮焚掠共賊十餘萬烏鎮賊首已投誠薙髮難民望東逃避依託烏鎮開土城納之幾不能容湖城賊攻圍烏鎮該鎮竭力抵禦接戰連日幾不能支

黃老虎率大隊掠至盛澤嘉興附近各村鎮圖解嘉興之圍蘇軍派營擊敗之黃老虎潰退沿途焚掠烏鎮投誠之賊再出搏戰時在二月中旬至十六日蘇軍克嘉興賊倉皇竄走湖郡此次焚掠幾及一月城東及東南並北至湖濱百數十里處處被焚掠吾潯幸正月間豫知賊信挈眷避向江蘇地方得免於難然遭劫者亦復不少非然者幾無子遺矣二月廿四日左軍克復杭省及餘杭三月初四日克武康初四日德清石門亦由左軍克復湖州城賊雖堅守惟恃泗安一路可竄皖境尙有退步咸聚菱湖東林山及附城二三里築堅壘駐悍賊以守之左軍由德清石門進攻港汊紛歧賊恃險易守故一時未能得手而南潯踞賊恐蘇軍攻擊時相驚擾忽於三月中一夜間棄土城

南潯志

卷四十五

大事記四

七

望西盡潰次日居民見土城寂靜方知賊走不數日蘇軍遣道員潘公鼎新丁軍門壽昌帶營至潯屯駐東柵土城中由是南潯設善後局招募鎗船以防土匪並聯絡蘇軍潘丁兩統領乃向西攻賊凡備用之物向局中索取供應南北設有警信蘇軍卽爲援助合攻湖郡乃調烏程縣方某通判佛齡阿巡檢胡某並烏程糧捕廳等官均駐南潯以理善後事宜馬要鎮亦設善後局防衛並設粥廠以振貧窮而晟舍猶駐悍賊據堅壘以守與軋村楊灣義舉各駐賊匪互相聲援東遷一帶時有賊匪出沒故馬要北鄉四五月間無一日得安也屯潯蘇軍雖時出隊由橫塘西柵運河兩路攻剿晟舍終牽制於漣港各賊旁抄後襲致未得手六月初蘇撫又調軍由湖塘屯紮吳淞擊走各漣

港踞賊又從宜興溧陽攻取長興廣德繞出西北境而左軍亦漸次將菱湖各賊壘攻下城賊惶懼七月廿五蘇軍駐潯道員潘鼎新率隊進攻晟舍並以吳淩蘇軍由北會剿連浙省張公星渠一軍亦由南而至遂合力攻之斃賊無算廿六日攻克晟舍追至八里店賊入城堅守不出於廿七日啟西門遁左軍遂入城南潯自十年夏被賊擾計一年有半被賊踞二年有半蓋湖郡失守較各郡獨後而克復亦較各郡爲遲潯地爲郡城東蔽適當其衝故受禍最烈房屋所遺不及十分之三此後之生聚教訓尤難人民之被擄被戕尙少而避鄉者之病死憂死者不可勝數世家大族轉瞬幾成絕戶其間衣冠士族於此四五年中生計已絕其貧苦爲更甚幸元二兩年秋收豐稔殷富寓

居上海者樂善爲懷各出己資購米並給米票以濟士類及孤寡冬間復備棉衣褲新舊各半男女人給一套時莊君杏園身任其事不辭勞瘁俾遭難困鱗稍得蘇息潯民雖居賊窟數年得寓滬諸君陰爲周濟出財出力誠大有造於潯也斯時縣令及各官均入城赴任南潯官紳拆毀東柵土城清理街衢善後義舉次第興辦夫潯鎮自明初攻張士誠於湖州兵士過境難免不擾然爭戰皆在東遷以上及昆山一帶沿鄉焚掠決不如粵匪之甚國初王師平定江南薙髮令下由漢策董公率同士民投誠故市肆不驚民居如故太湖巨寇雖屢欲犯潯賴董公團勇扞衛鄉里仍得安堵是五百餘年不見兵革獲享承平之福成此繁盛之區而風俗澆漓咸豐初年鎗匪充斥賭場林

立妓船聚泊民風大壞識者已預知劫運將臨果有兵燹之禍  
歷四五載而始熄雖曰天命豈非人事哉幸大難削平昇平重  
睹三十年來市廛稠密漸復舊觀吾潯父老子弟正宜安不忘  
危治不忘亂家崇勤儉士敦廉耻則余粵匪踞潯紀略未始不  
可借以爲鏡焉

吳焦生雜憶咸豐庚申六月十二日髮匪由平望震澤午後至  
潯鎮人於巳刻望鎮東火光熊熊卽相率遠避其不去者大都  
爲守家及年輕膽壯之人髮逆馬步隊約千人由東柵大街四  
散至西南北三柵放火示威傍晚卽東回故是日被殺被擄者  
尙少惟器物已一空如洗因匪去後人尙未敢回鎮而鎗匪土  
匪乘隙掠取然匪類所得者終歸髮賊劫去 八月十六日髮

南潯志

卷四十五

大事記四

九

匪又至鎮人狃於前日之事逃避者不及其半而匪勢披猖迥  
非前日之比逢屋卽焚逢人便殺逢物便搶無倖免者是日被  
殺被擄及自盡者幾數百人而房屋亦焚燬無遺繁盛之區竟  
成焦土北柵僅存圓通庵北聖堂及唐家兜蔣三松堂後河頭  
桂承慶堂余家肆雅堂老廳而已 踞潯之賊首海天燕次慶  
王次占天燕次源天義次平南主將次汲姓而占逆爲最久占  
逆姓何年四十餘隸於蘇州慕王譚紹洸踞潯後升占天福占  
天安又升至占天義其下有文巡捕虞姓武巡捕楊虎 占逆  
在東柵築一土城西至東弔橋堍南至上塘靠官河東至總管  
堂北至洗粉兜口拆民房爲之數月而成 占逆每審奸細必  
在董氏老墳灘有翁仲之處名之曰講道理在灘上築一臺用

一桌供香案上設一座屆時乘馬身衣繡花紅袍冠如釋教之毘盧帽時或用藍綢丈許圍裹額上兩端垂二三尺足着紅繡鞋隨十餘人至臺下作樂放槍然後升座其犯人釋縛口銜一筒或一篋使不能言占逆升座後先唸咒後問犯人數語卽說拿去砍了尸或埋或擲河中首級縛在槓上用兩卒抬走前一卒鳴鈺云有人犯逃走或短髮作妖或由滬來失買薙髮照等罪照此處斬週行四柵卽入號令籠中占逆下臺後仍鳴槍乘馬向土城回 其時占逆新舉一子各絲行皆送賀禮占逆發請帖款客年輕膽壯者竟爾赴宴到土城有小逆接進放鎗致敬設十餘席賀者穿馬褂馬衣一揖而已其席間侍者皆年輕小賊伺候極週席散送客時排列賊隊仍鳴鎗致敬 庚申三

南潯志

卷四十五

大事記四

十

月有江都司奉蘇省徐有壬撫軍札赴湖郡有馬步隊約五千人過潯在南柵土地堂暫駐數日軍容甚壯至湖不令進城復回至蘇後聞蘇垣陷與髮逆戰敗糧絕而散 鎮上設保安局

時沙鍋

鎗匪綽號

用鎗船數十號向東開至平望與賊接戰賊巢在

該鎮殷家沙初到時賊首並不知漸聞槍聲隆隆卽乘馬而出約十餘人是時沙手下船隻已經開回祇賸沙之坐船沙見賊來甚眾知不能敵卽投河被賊用鎗刺死時在庚申三四月間六月十二温金粟在保安局辦事髮逆到局伊危坐其中罵賊不屈被賊用手鎗擊死賊退後由邱立亭董其事 將亂時謠言甚多或遷居滬上或暫避鄉間及匪將到反甚寂靜祇聞履聲橐橐而已間有背血淋漓急急四竄者乃被賊追用鎗刺

傷者 南潯大塘爲往來要道逆匪陸續不絕見有從別處打先鋒過潯之船所擄難民用繩穿髮辮或三四人或五六人停舟將所擄之衣服售賣嘗有人過問一千文或二三元可取一大堆然人亦往往不敢買蓋賊中相傳口語云百文一斤肉可以買食千文一堆衣大不可買意謂將來仍是吾輩所有不過暫寄耳 賊到民家必先向牆門上挖看及廚下釜中水缸內亦盡搜索靡遺見靈座必放火見衣冠之人必殺之因謂妖故也見婦女必淫污之見年輕子弟則掠去掬重物不走則鞭撻之亦有取年輕貌美之人作爲公子者或能醫能縫能書算工作者必重視之此皆賊中所必需不但保身並可稍獲其利當時富商先期挈眷避居滬上亦有往來營運者髮逆關上稽

南潯志

卷四十五

大事記四

十一

察甚嚴若用外國人挂外國旗保護賊卽不敢顧問潯商之往來無阻者賴有此耳 髮逆安民後每家挂一門牌詳載丁口年歲以丁口之多寡定出費之大小各店並有日捐南柵蔣家橋下設總局亦名絲捐局四柵另設分卡收稅 髮逆告示首行云天父天兄天王太平天國第幾百幾天將某某擄人被逃捉到將其人面上刺太平天國四字刺後卽塗以醋用手搓之其色永不脫稱南京爲天京稱南潯曰小天京其辮極粗而大盤頸數轉妻稱真人短衣窄袖褲管極大喜穿紅綠色喫飯時先唸咒語賊目率赤或云喫人心肝所致 亂時設官絲行四家西柵爲莊恆慶杏苑李恆鼎萍波北柵爲吳晉昌鐵江南柵爲卜同昌朱蘭坡各絲行必須官絲行保結然後可開董事張姓絲

每包八十斤捐洋十六元外加一切零費洋八元絲行每日買絲斤數洋數有湯逆出來查明錄簿 未亂之前大街董宅有賭場在後面荷花池旁之小書廳輸贏甚鉅間有賭客自盡其中恐風聲漏洩於夜深人靜時以厚資雇駁船載至漾中沈屍滅跡 潯鎮自遭八月十六大劫之後死傷甚多房屋亦十不一存至次年南北市梢始有開小店者後漸引至市中兩岸搭蓋蘆扉棚以通貿易惟東西大塘時有往來客匪相戒不敢涉足卽南北有事亦必用舟往來當時之情景可想也

**徐有珂避寇記**郡亂於庚申二月我家出避自四月二十四日始先一日道路洶洶指戴山後林火乃亟向上林村張戚賃舟向東長田圩孫戚賃樓夤夜裹囊作食送母妻兩子兩女兩弟

南潯志

卷四十五

大事記四

十二

婦一姪避焉余與弟輩居守室中殘燈未燼淚涔涔下幾若一散不可復聚已復強收淚出偵則寇已退矣越數日復完聚十一月初六日寇及吳淩矣黃昏倉卒呼漁舟十日萬錢向曉泊大唐兜聞寇退仍越數日歸於是始備舟明年八月晦寇及軋村東南數十里徹夜若晝時余在綠葭灣團營阻雨朔日至家則家人已行矣見弟匆匆數語寇已及鮎魚灘遂別去次日寇經我村而北遂東焚團營余舟避胡淩宿丁公橋初三日晚方歸寇又經我村乃復避胡淩於是道路傳聞紛紛莫定初五日

至西南灣知我舟在下塘田而未暇往也初七日始相見始知三弟初三日遇賊伍浦被創見血幸無恙然橐空矣舟幾絕糧越日余先東歸看門戶橋多斷迂道由綠葭灣走五龍鳳凰兩

橋村皆無人餓犬見燈狂吠欲噬焦土浮尸相望我室幸無恙  
几案筐篋傾倒堆積無着足處旬日家人始歸十二月二十一  
日我郡四面賊至人人股栗念我生遭此大亂不能庇一母一  
子何以對先人乃命兒奉母遷上海兒欣然願往母不得已亦  
許行廿二日爲先祖先考諱日祭畢送母及兒出門家人皆含  
淚余強止之至萬壽橋過舟同吳子恭夫婦至沈協軒處夜半  
子恭返謂余曰我兩家在圓通橋候諸家齊集卽行無慮郡北  
已大亂也余亟至家呼舟中室中皆起皆口噤齒戰黎明放舟  
至伍浦載二妹由湖泊湯漚是時東南諸村落艇皆銜尾終夜  
擾擾廿七日至三十日大雪盈丈湖水厚數尺矣同治元年正  
月初六日人言商舶阻東亭子港上海有警我母思歸余聞之

南潯志

卷四十五

大事記四

十三

徹夜不寐鷄初鳴細君於船頭作食啖我步雪東行四十里見  
母舟次母驟問客從何來我應曰兒也乃喜甚問家人告以舟  
次湯漚各無恙乃命兒賃屋趙家港趙茂棠家將遷焉次日回  
湯漚則舟已解維追及之遂宿宋漚三宿因瀆村又宿丁家港  
十二日南風水解出湖至趙家港母子家人完聚居兩月弟輩  
時往來兜中屢聞賊踞我室則愁甚或爲之謀徙賊去三月初  
四日回里西隣猶賊也五月郡城陷私揣賊藪不可居而力不  
能遠徙姑匿影以待明年夏官軍復吳江七月十八日官軍白  
篷礮船百數十轟吳漚錢漚大漚賊駭竄於是父老歛歛謂不  
圖今日復見漢官儀衛矣豈知官軍卽向太湖西北去次日賊  
又麇至明知此後必大擾然天暑舟窄無奈何二十日雨霽晚

餐畢忽礮震有人立屋脊北望曰黑篷百道西北來泊錢漚矣  
又曰賊皆南奔矣其官軍至乎語未畢村口逃船相撞兜中船  
未動則賊已至矣我母急掩門賊已撐我船矣我弟不知何往  
我在門內急集家人出後門匿田間但聞處處打門雷動俄頃  
寂然一望忽紅日夜升則錢漚火而村無賊矣前門閉如故但  
物在舟亡天又大雨欲乘間南走急切無所措手足時兒在伍  
浦呼傭走探中途卽返云隣村火發矣余倉皇出門一探則昏  
黑中賊叱咤搥西隣門矣急掩門集家人出後門匿如故猛思  
欲扶母走則昏黑泥濘萬難出險獨走則不忍然不走被擄無  
身卽無母於是握母手含淚母亦令之走潛由朝皇兜過鳳凰  
橋脫履繫襪屢躓泥淖中至紅沙河舊傭煮鷄子食我天明於

南潯志

卷四十五

大事記四

十四

吳涇渭橋遇弟終夜狂走念母涕泣神色甚慘比至中兜則母  
已在岳家而細君輩走宋家兜細君見之泣詢之始知昨夜被擄兩  
未開兒至家旋至宋家兜細君見之泣詢之始知昨夜被擄兩  
次脫歸渡金家兜幾溺右手大指將指受傷髮去其半余至晚  
始知之然平時嘗自念立心仁恕所信者理必無他虞也越旬  
日復完聚此後輒作遠徙想八月間遣兒附火輪一夕達上海  
余擬秋末移家周莊俾弟居守而余外出籌資不意九月間屢  
遇警弟以奔走憂思伏暑一痢不起曾宿盛家匯地上一夕歸  
則漸沈重十月初二日逝矣余一身不能顧兩地遂於十一月  
朔奉母並眷屬到滬賃屋浦東清思釀尙顧金吾家竹籬板屋  
晏如也明年余館二百蘭亭齋在上海小東門兒館潘吟舫家

在董家渡一月兩歸省雖旅次常有天倫至樂六月兒入廣方言館肄業七月二十七日巳刻我郡克復將旋里乃爲之記

黃鍾聞見識餘逆匪竄潯數次士人殉難已登郡志者附貢生温文銓張喜曾附生温良棟金汝礪董書源孫士諤陳方毅張家春張撫辰武生莊祖鎔歸安廩生温家駒附生張以升沈思藻

李光霽癸亥除夕遣懷風寒雪冷度殘年隣舍無人斷暮

煙村社不聞傳臘鼓柴門誰更易春聯旌旗影裏親朋隔

虎豹叢中歲月遷宋嫂魚羹滋味好今朝聊復當家筵

除夕除

入市他無所有惟鯽魚兩尾買歸度歲焉

伏臘依然用漢時盛衰今昔費愁

思風高誤聽笳聲急夜靜潛看斗柄移冷到琴樽詩漸瘦

南潯志

卷四十五

大事記四

十五

煨殘芋栗睡偏遲屠蘇明日誰相勸窗外梅花三兩枝

張楨申江春感和簫士家山書到我心哀萬室都成劫後

灰踞穴鼠狐頻肆毒覆巢燕雀少完胎江天渺渺飛愁去

海國紛紛泊宅來有客彈冠正相慶寄聲珍重濟時才

紀磊亂後過南潯有感亂後經過總不堪孰爲西北孰東

南隣當贖後終無四路遇义時莫辨三荼毒應憐今日慘

荒淫誰悔昔時貪相逢病叟支離在忍把傷殘細與談

陸長春述感二百韻天道有盛衰人事多興替川原通塞

殊陵谷變遷易發生荷春恩肅殺感秋氣五行不廢金兵

革亦常事嗟予生不辰先幾示災異寥天鼓振枹永夜星

流彗寇從秣陵來斷我吳興臂漫山蛾賊屯徧野狼煙熾

我家潯水隈，僅賴城垣蔽。青犢逐風馳，朝發夕可至。練勇集，狗屠警眾聞。鶴唳欲釋妻，孥憂詭云寇。已退隣叟顧，予言君胡不早計。逆燄潑天狂，官軍似兒戲。環攻一城危，堅守四門閉。舟楫幸能具，曷弗亟遷避。潯南有老屋，松徑半榛蕨。移徙近十年，肩鐻久棄置。事急且相依，差勝居闐闐。裝成遊子輕，廬守先人敝。鄉隣喜我還，問勞兼安慰。煮茗邀我談，擊鮮留我醉。郡城已解圍，雉堞精兵衛。三驅封豕殲，一箭大兕殪。昨聞臨安陷，犀利賊鋒銳。流血滿城闔，屠戮慘可畏。將軍忽飛來，肋下插雙翅。破敵著奇功，頃刻蕩腥穢。妖氛既已遠，將略諒有備。斥堠盡嚴防，林泉得小憩。豆莢佐杯盤，蓴羹下鹽豉。黃梁味絕佳，一飽齁齁睡。醒來

曰三竿覓飲向茶肆，俄驚羽檄飛。惶遽東來騎，金陵寇甚張。斫營乘月晦，六千君子燭。十萬雄師潰，荒谷縊莫敖。長城壞道濟，死綏元不歸。生還甲盡棄，屹屹毘陵城。犬牙足相制，督師彼何人。宵遁舟先次，蘇臺賊內訌。間諜常窺伺，鬼哭煙塵紅。屍積河流膩，吾鄉徐中丞。碧血朝衣漬，千里無堅城。三吳如鼎沸，時予處荒村。憂危日惴惴，訛言旦夕興。寢饋一時廢，松陵旣不守。秀州又失墜，棄家人其逃。從逆官多僞，晨起見敗兵。三五不成隊，足蹙面亦傷。衿捉履則曳，破柵搜雞豚。打門索酒食，野老婉致詞。無解申申詈，潯溪從南流。川塗鮮回滯，蝸舍當其衝。蹤跡焉能閤，避亂訪桃源。水村深且邃，葭蒲曲岸通。桑竹茂林翳，寒暄雜翁

媪逢迎到童穉牛宮耕耒懸鴨渚釣船繫此間洵樂郊願  
乞一椽庇蠨蛸爲掃除讓宅推高誼明朝送孥去離別發  
深喟殊辜隣里情不盡遮留意篷窗聞礮聲火光燭天際  
人言寇至潯約略見旗幟村農倚門待云已久凝睇是鄉  
遠市塵守夜虬不吠累甃牀易支懸釜竈失祭宵眠晝得  
餐此外復何冀螭踴予獨歸入門視篋笥猶喜無寇蹤笥  
鑰仍封識相安僅五旬烏戍驚烽燧彼都難久留近在十  
里內攜家返故園遷徙一而再縱有武陵谿問津吾未逮  
蕭瑟已經秋艱難復卒歲危檐冰墮釵敗壁鐙搖穗織蒲  
妾尙勤識字兒偏慧相守不敢離終日愁顏對脍鮓過新  
年春光漸明媚少女待湔褰頑童正挑菜夜聞滿村譁剝

啄聲加厲寇來今始真竄逸踵相繼亟麾家人去襍被野  
航寄但顧懷中兒勿顧簪與珥黃巾似擁蠡喊聲達以四  
凶暴胡可撓疾走屢顛躓如鴻避矰矰如雉離罟罟吉凶  
任天判趨舍從眾議扶肩野橋危傷趾路石礙止渴欠酸  
梅充饑少乾糲薄暮向田家求宿形如丐田家頗有情憫  
我足力憊黃蘗發壘香留客俱粗糲夜火射萑蒲耿耿不  
能寐朝來詢途人云賊退猶未焚掠徧四鄉荼毒無噍類  
我聞心怦怦若芒刺在背鋌險鹿斯奔脫網魚又逝流離  
滿道塗鄭俠圖難繪天胡降此厄相對惟歔歔再宿寇云  
遙雷霆爲開霽倉皇急還家事定魂猶悸度藏衣履空餘  
賸米鹽匱前村甲第災後巷丁男斃新婦磯頭沈老媪室

中縊吾家幸無恙瓦全出天賜賊去恐復來其情殊詭秘  
商量買村艖不惜多錢費書生尠長物敝衣經補綴悉索  
付榜人零星又瑣碎既無富家資胡來褐父睨劫斂遇強  
梁莫遏洶洶勢室人愁單寒眉鎖兩峰翠穉子惜襦褌謂  
是孃新製我意自夷然百端相慰譬方今寇盜充物在終  
爲累饑來苦驅人謀生賴計會趁墟聚蚩氓炎歊不可耐  
午餐惡腥羶夜枕憎蚊蝨時聞銅馬鳴見利寧忘害仲秋  
月將盡有客走相謂賊艘數盈千齊泊金閶外云將略菰  
城連營到西塞通衢此咽喉防守嚴應戒客言未及畢東  
望起塵壒彌漫殺氣濃匝匝陣雲壞速泛五湖舟鳴撓入  
煙靄檣帆接渺冥金鼓震聾聵大掠踰兩旬殺人如草芥

流毒百里餘浩劫付長嘅故居傍清苕一水長如帶何處  
匿扁舟念之欲垂涕亂離憂骨肉恐被虎狼噬咫尺阻刀  
兵相見愁無地潛行繞頤塘月黑宵鼓柁陰風灑毛髮鬪  
人多鬼魅出險猶徬徨尋蹤獨延企一櫂忽凌波全家重  
把袂嬌兒動人憐見我先怨懟耶胡不蚤歸不歸殊憤憤  
繼言寇屢逢孃已哭聲大急切恃篙工全賴回船快露寒  
號似蛩艙小縮如蝟五夜腹常饑十日面不醜耶今破冢  
還願同瓜皮載患難須共嘗生死毋相背聞言我心酸豈  
不兒女愛征鴻覓稻梁離逃眞無奈舞纛寇愈驕輿尸軍  
又敗摸金甌邱壟碎壁傷粉黛助虐有戈船橫行更亡賴  
垂涎虎視眈攫食鴟鳴怪故鄉難圖存不如遠行邁荒涼

井里墟局躋乾坤隘瀛壖帶魴潯州處而羣萃人與鮫鱷  
隣壤接犬羊界扞捫仗島夷避地此爲最移家五口俱乘  
月片帆挂當道臥豺狼啞人比蜂蠆危塗歷嶮驚濤聽  
澎湃跋涉來此鄉此鄉盛冠蓋膺仕簪纓華鉅賈珊瑚賽  
海氣湧金銀市塵混珠貝街衢錦繡鋪樓閣丹青畫蛤帳  
閉瑤英羊車看衛玠乘驄貴客遊魚鳳羣仙會而我蝨其  
間寒酸無乃太傭書債未完賃廡金誰貸晨炊米數珠晚  
爨薪折桂徒營蚊睫巢難覓蠅頭利繩穿管子牀葛冷西  
華帔悠悠行路心默默窮途淚客言君甚愚何不事權貴  
曳裾能相容吹竽可濫廁不見同舍郎多金似蘇季廣筵  
宴賓僚比房列姬侍當其落魄時見人常自媿一朝附津

要便覺身心遂諧媚人共歡兀傲眾所忌今君苦屯遭應  
少投時器迥然謝不敏多君惜顛賴松栢抱堅貞不同眾  
芳麗春風逞妍華雨露均霑被歲寒不易操所以殊凡卉  
我生適兵燹自分宜顛沛枉道而徇人安忍爲此態九州  
多塵霾三年依海澨髻添潘岳絲懷賸襴衡刺酒肉謝朋  
儔管絃厭隣比獨坐屢摧眉苦吟時擁鼻鄉關猶鼓鼙水  
程隔迢遞鶯花日暮愁鱸膾秋風思卑棲枝寄鶴急景隙  
過駟豬肝累尚牽雞肋食何味富貴固難期阨窮非自致  
安能久居此鬱鬱不得志我思遊閭風去作神仙吏駕鼉  
蹈洪濤控鶴飛輕轡碧城樓可居丹鼎藥堪餌鷄犬共昇  
天長謝人間世

陳根培湖陰清話道咸年間村莊完漕米一石加耗米一斗一升一合零者謂之九折及遞減至八折者均謂之硬莊完六七折至四五折者謂之軟莊最次者增價完錢不能完米謂之折莊十一月開倉時議價每米一石完錢五千八九百零由漸而加至七千餘雖訴諸府道藩撫不能更改蔣漙陸晝堂安徽縣丞以丁艱回籍欲改完米縣不允訴諸府府亦不允固爭之卒棄官完錢與完米界限區分如此咸豐三年金陵失守後博徒各造划船置刀鎗於其中謂之鎗船到處演劇引誘賭博官不能禁止由是折莊亦思逞府縣轉用鎗船以惕之鎗匪益恣肆無所忌南潯博徒錢榮莊遇近村有小爭訟爲之排難解紛後訴者益眾往往得一言以解漸集鎗船百餘某說之曰我邑漕

米十二萬石有奇逾於河南甘肅各全省之半多於湖南湖北各省三之二吏又魚肉之完米者出二石之米不能當一石之納完錢者出三石之價祇以完一石之糧鄉人痛心久矣子若能約近鎮各村莊盡行完米定八九折轉弱爲強功莫大焉四鄉且歌頌不衰矣榮莊欣然從之眾皆響應漕米船聚至千餘艘徧插白旗謂之白旗幫銜尾進城河爲之塞聲言欲完九折府縣恐激變轉爲好言以慰之吏胥又再三懇榮莊乃一律完米七三六折謂一石米加四斗三升耗米也由是不入白旗幫者亦盡行完米如其數無淋尖無踢斛無袋費一變從前積習後榮莊卒斃杖下初時每屆完漕如人家田數不多或商於外或留米待來年食貪便照米價折錢謂之小折迄後莊多小折

者卽歸入折莊蓋強弱之分皆由胥吏肥己之謀官爲利惑遂任其計算以致漕弊叢生間有廉明長官亦知欺君虐民之非計而各衙署之陋規吏胥之把持已積重難返卒因循而不改至鎗匪土豪羣起而後漕務爲之一變亦可慨也

李光霽劫餘雜識咸豐六七年間著名賭匪喬家兜錢榮章嚴墓沈三沙鍋阿四震澤吳長林新篁陳二新勝吳連生盛澤孫七等皆乘寵亂集無賴數百人私製砲火鎗刀造小船容四五人者名曰鎗船就各鎮市設博場名曰老桌潯溪在北柵後河頭者曰吳廳在南柵曰朱廳以吳朱二宅得名也汪家兜四牌樓城濠等處各設廠聚博徒招女優時裝演劇晝夜不輟曰花鼓戲佐以妓船各一二十艘常川停泊曰跳板船畫舫笙歌靡

南潯志

卷四十五

大事記四

二十一

靡達旦匪類藉此以招博徒得彩以供揮霍數千亡命恃眾橫行睚眦殺人戕官拒捕一日錢榮章與沈三沙鍋阿四在東柵市河械鬪施放鎗砲燬民房傷民命潯溪爲罷市一日識者已決爲大亂之兆大府迫於公論派某都司名捕至南柵嘉應廟前登高瞭望忽鎗彈擊傷左額鼠竄而去後派某觀察督兵剿捕始獲錢榮章一人至縣杖斃餘人仍跋扈如故日則橫刀過市騷擾閭閻夜則十百成羣四出劫掠搶孀逼醮擄人勒贖恣所欲爲蓋至是而鎗船賭匪之爲禍烈矣厥後粵匪至託名安民亦惡鎗匪爲患各處剿殺承平後江浙大吏復實力捕治而鎗船之名始滅

徐有珂燕曹問答體元逸客燕正言問於介軒主人曹直院曰

聞此間有花會信乎曰然國家兵防十里雙堠五里隻堠今博局多於斥堠矣客曰何謂花會曰不知其詳但聞有胡蝶花林太平爲老龍碧桃花林銀玉爲螃蟹諸目共三十有四刊爲圖然此間呼爲字寶不稱花會客曰官不禁乎曰彼鎗船皆插府縣官衙旗幟於舵尾其渠魁亦用撫部鹺使銜官惡能禁之客曰不禁可無害乎曰花會之設能使人廢時失業喪心病狂至於滅三綱五常無父無君無天地而後已不急掃除則禍更烈於洪水猛獸矣客曰若是其甚歟曰殆有甚焉洪水猛獸人避之花會人趨之我但見此事初起人卽麇至或戲投一錢至千百錢且千錢不等無何千錢者中輒予三十貫而千錢仍在也其少者亦如之於是萬目凝視萬口沸騰詫爲奇贏誇爲捷得

幾若世間謀利之途無過於此彼焦勞心力作苦終身者眞大愚人也曷若竭心思於此之爲得乎且失之少而得之多十失而一得焉猶獲兼倍之利若能竭心思十豈無一得焉於是瞠目凝神馳思幻想食至不應火至不見自朝至暮繼之以夢明日復然如是累月農不耕工不作商不販織投杼牧亡羊卽讀聖賢書者亦揜卷茫然也方數十里可十萬戶無晝夜無賢不肖皆迷焉所不迷者僅百之一客曰斯眞廢時失業矣於是客容憮然主人曰未也其中得者少失者多不得已則與神謀與鬼謀而祈禱之事作焉其始拜跪於家庭井竈里社叢祠旣而求諸枯骨殘骸破棺荒塚及生前遊場橫死之鬼夜深人靜則攜紙錢并一臠肉或魚炙酒一大缶喁喁祝之不應則磔雞瀝

血斧其棺骸於是怪鳥驚啼陰燐四出其人亦如醉如癡僵仆其旁若有所聞至天明乃醒客愴然曰斯真喪心病狂矣曰未也有梓祖宗栗主及神祇莊嚴法相戲權輕重以爲卜者有燒甲馬紙錢魘魅親生幼稚兒女奉以爲神拜跪禱祝者有女子夜行抱骷髏而歸納衾裯者其事益奇其法益驗客忿然曰是滅三綱五常矣果若是其甚歟夫蕩覆彞倫是無父也不畏王法は無君也顛倒陰陽瀆亂幽明是無天地也爲之奈何而直院主人亦曰爲之奈何

吳焦生雜憶咸豐八九年賭匪沈三沙鍋長林在東柵外四牌樓前大開博場晝夜不息招雇跳板船即妓數十艘停泊其旁

引誘良家子弟其賭有打攤做寶之分又有名爲字寶者是沈

南潯志

卷四十五

大事記四

二十三

三爲頭家四柵設字寶場四處其正莊在北柵清風橋河西埭前空地搭蘆扉柵圍以擋木設櫃收錢付票共三十六門每錢一文者以三十倍償之故婦孺之錢搜括殆盡每日早晚開兩次做法以竹筒劈作兩片中置一字牌開時放爆竹一串將繩一扯筒卽自開見一牌爲某某如打中者卽持票取錢另有印莊分設多處俾就近分打中則照正莊賠錢嗣後又換出題中彩暗切水滸人名凡一百八人中者一錢賠百文所出題目未見貼切偶然文理稍通輒被人猜去所以不通者居多其場所在後河頭蓬萊居茶室 沈三沙鍋長林三人因爭奪賭場甚至持械角鬪東柵弔橋埭用柵闌住派鎗船把守長板橋對河一帶及天帶橋埭各執盾鼻並綫鎗互相激戰鎗林彈雨中

誤傷行人不少因此罷市數天 初四牌樓演唱花鼓戲傷風  
敗俗莫此爲甚後移至東柵外汪家兜壬戌年又移至西木巷  
對河北小圩因沈三於其處開設賭場架木爲橋以通行人同  
治初年郡委來潯擬拆此橋爲張企亭梗議蓋北小圩之地張  
以賤值得之苟無此橋則其地不能振興市面故與邑人涉訟  
累年卒寢拆橋之議 亂前停跳板船而不兼賭場者有數處  
曰栲佬灣西交界壩橋老墳灘每至夕陽西下時麗服艷妝坐  
船頭品竹彈絲藉資引誘北柵則賭場花鼓戲跳板船兼而有  
之人尤趨之若鶩

湖陰清話鎗匪初事賭博尙有陋規至府縣借以制糧戶遂寫  
府縣正堂旗徧插船尾公然演戲聚賭除陋規並設花會咸豐

南潯志

卷四十五

大事記四

二十四

八九年間鄉民之無賴者訟事不訴諸官而訴之鎗匪匪卽呼  
其黨羽將被訴之人扭去以其髮懸之梁復痛毆之或出洋泉  
數十元至數百元甚至數千元始釋去沈紀常鎗船行云鎗船  
健兒好身手白布束腰羶蓋首藍呢背甲繡襖襠白眼橫斜滿  
街走鎗船來鎗聲一路轟春雷橫拖倒曳捉人去睚眦之怨成  
飛災東市醉千觴西市博千場湖郡義勇旗堂堂巨紳大賈閉  
門避老拳毒手誰敢當粵匪來鎗船散雙槳如飛語言亂潯溪  
烽火光燭天縮首菰蘆背浹汗粵匪去鎗船呼短衣帕首盈街  
衢若得金錢若珠寶拏舟捆載爭前驅噫嘻民不苦寇兵乃苦  
鎗船勇狗苟狼貪勢洶洶大官勦賊方勞心若輩橫行上聞壅  
何時盜息天網張梟首沈船斷遺種君不見蚩尤兩塚高成堆

么麼之醜何有哉

許旦復潯鎮南鄉爲納糧聚眾欲與縣主相抗者感賦二

律名分虛懸眾志離囂然不靖此奔馳蠲租本少道州守

倡義寧同河朔旗

數十舟號召鄉里  
舟尾各懸一白旗

蟻聚蜂屯矜作健鉦

鳴鼓駭問何爲急公輸粟由來事一起爭端後可知古

來三老鎮鄉閭條教分明責任渠子弟豈容輕越禮循良

端在守懸書漢唐遺詔還存否召杜風流亦渺如上下乖

違何至此潰防將奈此狂且

南潯志卷四十五終

南潯志

卷四十五

大事記四

二十五